

Unammilleqatigiinnermut Ataatsimiititaliap suleriaasissaa taassumalu suliasai pillugit Namminersorlutik Oqartussat nalunaarutaat nr. 12, 23. juuli 2015-imeersoq

Unammilleqatigiinneq pillugu inatsisartut inatsisaat (unammilleqatigiinnermut inatsit) nr. 1, 15. maj 2014-imeersoq § 26, imm. 3 malillugu ima aalajangiineqarpoq:

Kapitali 1

Unammilleqatigiinnermut Ataatsimiititaliaq

§ 1. Unammilleqatigiinnermut Ataatsimiititaliap unammilleqatigiinnermut inatsisip taassumalu malitsigisaanik maleruagassat aalajangerneqarsimasut aqunneqarnissaat pingaarnersaallutik akisussaaffigai.

Imm. 2. Unammilleqatigiinnermut Ataatsimiititaliaq unammilleqatigiinnermut inatsisip aqunnerani Naalakkersuisunut attuumassuteqanngilaq.

§ 2. Unammilleqatigiinnermut Ataatsimiititaliaq inuussutissarsiornermik ingerlataqartut atuisartullu soqutigisaannut attuumassuteqanngitsumik siulittaasup tullianik toqqaassaaq. Siulittaasup tullia siulittaasumut sinniisaavoq.

Imm. 2. Ilaasorta q toqqarneqarnermini inuussutissarsiornermik ingerlataqartut atuisullu soqutigisaannut attuumassuteqanngitsoq, piffissami atuuffigisamini inuussutissarsiornermi suliffeqarfinnut, inuussutissarsiornermi kattuffinnut imaluunniit atuisartut kattuffiinnut taama attuumassuteqalissagaluaruni, taamaalillunilu arlaannut attuumassuteqannginnissamut piunasaqaat eqquutikkunnaarlugu, ilaasorta q Unammilleqatigiinnermut Ataatsimiititaliamit tunuassaaq. Taamaalereerpat ilaasortaagaluartup piffissap atuuffissaraluata sinneranut Naalakkersuisut ilaasortamik allamik toqqaassapput.

Imm. 3. Nalunaarut manna malillugu ilaasorta q nipangiussisimasussaataa nerminik unioqquutisisimappat imaluunniit pisussaaffimminik annertuumik sumiginnaasimappat tunuartinneqarnissaa pillugu siulittaasoq Naalakkersuisunut inassuteqarsinnaavoq.

Imm. 4. Unammilleqatigiinnermut Ataatsimiititaliamut ilaasortat tamarmik unammilleqatigiinnikkut niueqatigiinnikkullu pissutsinik piffissamut tulluuttunik piginnaaneqassapput kiisalu pissutsinik unammilleqatigiinnermut inatsimmi § 27, 3. pkt.-imi taaneqartut arlaannik arlalinnilluunniit annertuumik ilisimasaqartussaallutik.

Imm. 5. Unammilleqatigiinnermut Ataatsimiititaliamut ilaasortat Unammilleqatigiinnermut Ataatsimiititaliami atuunnerminni arlaannut attuumassuteqarnatik sulissapput, taamaalillutillu ilaasortaanertik arlaannut attuumassuteqanngitsumik peqqissaartumik torersumillu ingerlatissallugu.

Imm. 6. Kattuffiit ilaasortanik innersuussisinnaatitaasut, ilaasortassanik Unammilleqatigiinnermut Ataatsimiititaliamut innersuussinerminni imm. 4-mi piunasaqaatit

taaneqartut tungaasigut eqquutsitsisinnaasutut tunngavilersuuteqarlutik ilaasortanik innersuussissapput.

§ 3. Inuussutissarsiornermi kattuffiit makku ataatsimoorlutik Unammilleqatigiinnermut Ataatsimiititaliamut ilaasortamik ataatsimik inassuteqarsinnaatitaapput:

- 1) Sulisitsisut
- 2) NUSUKA.

Kapitali 2

Piginnaatitaanerit aamma aalajangiinerit

§ 4. Unammilleqatigiinnermut Ataatsimiititaliaq, Naalakkersuisunit peqquneqarnermigut, unammilleqatigiinnermut inatsit malillugu maleruagassanik aalajangiinissamut atatillugu oqaaseqaateqartassapput.

§ 5. Unammilleqatigiinnermut Ataatsimiititaliaq nammineq piumassutsini malillugu, nalunaarutiginninnerit malillugit, imaluunniit maalaaruteqarnerit tunngavigalugit sulianik sammisaqarsinnaavoq, tak. unammilleqatigiinnermut inatsimmi § 26, imm. 1, 2. pkt.

Imm. 2. Unammilleqatigiinnermut Ataatsimiititaliaq pisortani oqartussanut tunngavilersuuteqarluni oqaaseqaatinik nalunaarutigisat pillugit aalajangiissaaq, unammilleqatigiinnermut ajoqutaasumik sunniutaasinnaasut kiisalu sammisami pineqartumi unammilleqatigiinneq siuarsarniarlugu uparuarlugit, tak. unammilleqatigiinnermut inatsimmi § 2, imm. 4.

Imm. 3. Unammilleqatigiinnermut Ataatsimiititaliaq sammisat tunngavissaqarluartut imaluunniit immikkut ittumik pingaaruteqarluinnartut pillugit aalajangiissaaq.

Imm. 4. Unammilleqatigiinnermut Ataatsimiititaliap unammilleqatigiinnermut inatsit malillugu aalajangigai ilaasortat kikkut suliap sammineqarnerani peqataasimanersut pillugit paasissutissanik imaqaassapput.

Imm. 5. Ataatsimiititaliap suliaqarnera pillugu nassuiaatit paasissutissallu Atuisartunut Unammilleqatigiinnermullu Aqutsisoqarfiup tamanut saqqummiussinnaavai.

§ 6. Unammilleqatigiinnermut Ataatsimiititaliaq suliamik sammisaqarnissamik kinguartitsinissaaq pillugu aalajangersinnaavoq, paasissutissanik amerlanerusunik pissarsiorinissamut pisariaqarpat, taamattaq Unammilleqatigiinnermut Ataatsimiititaliaq sulianik immikkut ilisimasaqartut Unammilleqatigiinnermut Ataatsimiititaliap suliarinninneranut peqataaqqullugit qinnuigisinnaallugit. Sulianik ilisimasaqartut suliffeqarfinnut imaluunniit suliffeqarfinnut kattussimasunut suliamik suliarinninnerminni peqataaffigisaminnut attuumassuteqassagunik soqutigisaqassanngillat imaluunniit attuumassuteqarfeqassanngillat.

Kapitali 3

Unammilleqatigiinnermut Ataatsimiititaliap allattoqarfia

§ 7. Unammilleqatigiinnermut Ataatsimiititaliap allatseqarnikkut suliai Atuisartunut Unammilleqatigiinnermullu Aqutsisoqarfimmit isumagineqartarput.

Imm. 2. Atuisartunut Unammilleqatigiinnermullu Aqutsisoqarfiup suliaasai pisinnaatitaaffiilu Atuisartunut Unammilleqatigiinnermullu Aqutsisoqarfiup suliaasai pillugit Namminersorlutik Oqartussat nalunaarutaani aalajangersarneqarput.

Kapitali 4

Siulittaasup pisinnaatitaaffii

§ 8. Unammilleqatigiinnermut Ataatsimiititaliap siulittaasuata Unammilleqatigiinnermut Ataatsimiititaliap ataatsimiinneri pilersaarusiussavai aqullugillu, tamatumunngalu atatillugu ilaatigut makkuninnga pisinnaatitaaffeqarluni.

- 1) Oqaasiinnartigut ilanngussaqaarnissamut sivisussusissaanullu piffissamik aalajangersaanissaq.
- 2) Oqaasiinnartigut ilanngussaqaarnissamik piareersarnermut tunniussinnermullu atatillugu suleriaasissaq pillugu aalajangiinissaq, ilanngullugu § 10, imm. 4, uniffik siullermi oqaatigineqartutut sunniuteqartussamik piffissaliussanik aalajangersaaneq.
- 3) Ilanngussaqaarneq pissutsinut suliame aalajangiinissamut pingaaruteqanngitsunut tunngasimappat imaluunniit innersuussipat, oqaasiinnartigut ilanngussaqaarnissamik mattussineq.
- 4) Sammisat taasissutaasussat inissitsiterneri.
- 5) Unammilleqatigiinnermut Ataatsimiititaliap isumaqatiginninniarsimaneri pillugit isummerfigissallugit.
- 6) Allanguutissatut siunnersuutit taasissutigineqarnissaasa tulleriaarnissaannut aalajangiissalluni.
- 7) Ataatsimiinnermut oqaluuserisassani allanguissalluni.

Imm. 2. Paasissutissanik illersuilluni mianersuussuteqarnissaq pillugu siulittaasoq inaarutaasumik aalajangiissaaq, tak. § 15, imm. 2.

Imm. 3. Suliat ataatsimiititaliap aalajangiiffigisassaattut pisussaaffii, ataatsimiititaliallu ataatsimiinnissaanut utaqqissunneqarsinnaanngitsut pillugit siulittaasoq Atuisartunut Unammilleqatigiinnermullu Aqutsisoqarfimmi pisortaq peqatigalugu aalajangiisinnaavoq. Aalajangiinerit taamaattut pillugit Unammilleqatigiinnermut Ataatsimiititaliap tulliani ataatsimiinnerani nalunaarutigineqassapput.

Imm. 4. Allaganngorlugit najoqqutassat ataatsimiititaliap ataatsimiinnerani aatsaat agguarneqarnissaat ataatsimiinnerullu naammassinerani utertinneqarnissaat pillugu siulittaasoq aalajangersinnaavoq.

Kapitali 5

Ataatsimiinnerit

§ 9. Unammilleqatigiinnermut Ataatsimiititaliaq ulluni ataatsimiiffissatut Unammilleqatigiinnermut Ataatsimiititaliamit akuerineqarsimasaanni ataatsimiittassaaq, imaluunniit siulittaasup tamatumunnga peqqutissaqartitsinera malillugu qanorluunniit akulikitsigisunik ataatsimiittassaaq.

Imm. 2. Ataatsimiinnissanut sivikinnerpaamik ulluni 14-inik sioqqutsisumik kalerriilluni aggersaasoqartassaaq, suliap nukinginnassusia eqqarsaatigalugu siulittaasoq allamik aalajangiisimangippat.

Imm. 3. Ataatsimiinnissamut aggersaaneq oqaluuserisassanik malitseqassaaq, suliat sammineqartussat pillugit sapinngisamik imaqarnerinik nalunaarutiginnittumik, najoqqutassallu sulianik samminninnissanut pisariaqartitanik ilanngussisoqartussaalluni, takuulli § 8, imm. 4.

Imm. 4. Ilaasortat ataatsimiinnermi peqataasinnaangitsut, tamanna pillugu sapinngisamik piaarnerpaamik Atuisartunut Unammilleqatigiinnermullu Aqutsisoqarfimmut nalunaarutigissavaa.

Imm. 5. Atuisartunut Unammilleqatigiinnermullu Aqutsisoqarfiup pisortaa, taassumalu aalajangigaa malillugu Atuisartunut Unammilleqatigiinnermullu Aqutsisoqarfiup sulisui allat taasisinnaatitaanatik Unammilleqatigiinnermut Ataatsimiititaliap ataatsimiinneranni peqataasassapput.

Imm. 6. Unammilleqatigiinnermut Ataatsimiititaliap ataatsimiinneri tamanut ammasuunngillat.

§ 10. Unammilleqatigiinnermut Ataatsimiititaliap aalajangiinerani pineqartoq imaluunniit pineqartut, Unammilleqatigiinnermut Ataatsimiititaliap suliame aalajangiinnginnerani Unammilleqatigiinnermut Ataatsimiititaliamut oqaasiinnartigut naatsumik ilanngussisinnaatitaapput. Ilangussinerup sivisussusaata, siulittaasoq § 8, imm. 1, nr. 1 naapertorlugu allatut aalajangersaasimangippat, minutsit 10-it qaangissanngilai. Oqaasiinnartigut ilanngussaqaarniartoq allanit sinniisoqarsinnaavoq imaluunniit ikiorneqarsinnaalluni.

Imm. 2. Suliami allaganngorlugit najoqqutassat annertunerpaatigut Unammilleqatigiinnermut Ataatsimiititaliamit ilisimaneqartut naatsorsuutigineqarsinnaavoq, taamaattumillu oqaasiinnartigut ilanngussaqaarneq suliame pissusiviusuni inatsisitigullu pisunik annertunerusumik itisiliinnermut imaluunniit paasinarsisitsinnermut taamaallaat tungassuteqassaaq. Oqaasiinnartigut ilanngussaqaarnermut nangissutigalugu, siulittaasup akuersineratigut, ilanngussaqaartumut itisiliisunik apeqquteqarnissaaq periarfissaqarpoq.

Imm. 3. Oqaasiinnartigut ilanngussisoq imaluunniit ilanngussisut, ataatsimiinnissaaq sioqqullugu allakkiamik Atuisartunut Unammilleqatigiinnermullu Aqutsisoqarfimmut nassiussinissamut pisussaaffeqarpoq, tassani pisut pissusiviusut taamatullu inatsisinut

tunngasut tamarmik, ataatsimiinnerup nalaani eqqartorneqartussat, takussutissianngorlugit allassimassallutik. Siulittaasup tamatumunnga killissaliussaq erseqqinnerusoq aalajangersassavaa, takuuk § 8, imm. 1, nr. 2.

Imm. 4. Unammilleqatigiinnermut Ataatsimiititaliap aalajangiinerani pineqartoq imaluunniit pineqartut, piffissaliussaq siulittaasumit aalajangersarneqartoq, takuuk § 8, imm. 1, nr. 2, malinnigippassuk imaluunniit allatigut Atuisartunut Unammilleqatigiinnermullu Aqutsisoqarfik nalunaarfigippassuk, pineqartoq ataatsimiinnermi Unammilleqatigiinnermut Ataatsimiititaliap suliami aalajangiinissaa naatsorsuutigineqartumi najuussinnaannigitsaq, Unammilleqatigiinnermut Ataatsimiititaliamut ataatsimiinnerup nalaani oqaasiinnartigut naatsumik ilanngussaqaarnissamut pisinnaatitaaffeqarneq annaaneqassaaq. Taamaattoq pineqartoq taamatut pisoqartillugu tamatumunnga taarsiullugu Unammilleqatigiinnermut Ataatsimiititaliami ataatsimiinnissaq sioqqullugu Atuisartunut Unammilleqatigiinnermullu Aqutsisoqarfiup ataatsimeeqatiginissaanik neqeroorfigineqassaaq. Atuisartunut Unammilleqatigiinnermullu Aqutsisoqarfiup Unammilleqatigiinnermut Ataatsimiititaliap pineqartumik ataatsimeeqateqarneq pillugu ilisimatissavaa.

Imm. 5. Ataatsimiinnermit Unammilleqatigiinnermut Ataatsimiititaliap suliami aalajangiinissaanik naatsorsuutigineqartumit, Unammilleqatigiinnermut Ataatsimiititaliap aalajangiinerani pineqartoq imaluunniit pineqartut takkutinnigitsoorpata, Unammilleqatigiinnermut Ataatsimiititaliap tunngavissat pigineqartut tunngavigalugit suliami aalajangiisinnaavoq.

Imm. 6. Unammilleqatigiinnermut Ataatsimiititaliap aalajangiinerani pineqartoq imaluunniit pineqartut, taamaallaat oqaasiinnartigut ilanngussaqaarnissamut imaluunniit ilanngussaqaarnissanut, aammalu tassunga atatillugu apeqqutissaasinnaasunut atatillugu Unammilleqatigiinnermut Ataatsimiititaliami ataatsimiinnerup nalaani najuussinnaatitaapput.

Kapitali 6

Oqaluuserisassat

§ 11. Unammilleqatigiinnermut Ataatsimiititaliap ataatsimiinnerini oqaluuserisassani immikkoortut aalajangersimasutut makku ilaassapput:

- 1) Unammilleqatigiinnermut Ataatsimiititaliap maleruagassat malillugit aggersarneqarsimasooq pillugu siulittaasup nalunaarutiginninnera, ataatsimiititaliarlu aalajangiisinnaassuseqaarnersoq, kiisalu ilaasortat ilaat arlaannut attuumassuteqartuunersut.
- 2) Unammilleqatigiinnermut inatsisip ulluinnarni aqunneqarnera pillugu Unammilleqatigiinnermut Ataatsimiititaliap sinnerlugu Atuisartunut Unammilleqatigiinnermullu Aqutsisoqarfiup pisortaanit nalunaarut.

Imm. 2. Tamakku saniatigut suliat ingerlaavartut apeqqutillu allat unammilleqatigiinnermut inatsisip nassuiarnissanut tunngasut sammineqaarnissaat pillugu Unammilleqatigiinnermut Ataatsimiititaliap piunasaqaarsinnaavoq

Kapitali 7

Taasisarnermi maleruagassat

§ 12. Siulittaasoq, taassumaluunniit najuutinnginnerani siulittaasup tullia, ikinnerpaamillu ilaasortat arfiniliusut (6) sinneri pingasut (3) najuutsillugit Unammilleqatigiinnermut Ataatsimiititaliaq aalajangiisinnaassuseqarpoq.

Imm. 2. Unammilleqatigiinnermut Ataatsimiititaliaq taasinermi nalinginnaasumik amerlanerussuteqarnikkut aalajangiisarpoq. Taasinerit amerlaqatigiinnerini, sulittaasup taassumaluunniit najuutinnginnerani siulittaasup tullia taasineri aalajangiisuusaaq.

Kapitali 8

Allattuiffiit Protokol

§ 13. Unammilleqatigiinnermut Ataatsimiititaliap ataatsimiinnerini tamani Atuisartunut Unammilleqatigiinnermullu Aqutsisoqarfik protokolimut allattuissaaq, tassani makku allattorneqassallutik:

- 1) Suliat sammineqarnerini ilaasortat kikkut peqataasimanersut.
- 2) Sulianut ataasiakkaanut tunngatillugu Unammilleqatigiinnermut Ataatsimiititaliap aalajangiineri. Taasisoqarnerani taasinerit kisitsisitali allanneqassapput.
- 3) Unammilleqatigiinnermut Ataatsimiititaliap aalajangernermut tunngavilersuutaa, tunngavilersuut suliap aalajangiiffiqeqarnissaanut Atuisartunut Unammilleqatigiinnermullu Aqutsisoqarfiup missiliuutaanit allaanerusimappat.
- 4) Ikinnerussuteqartut isummernerat, pisariaqartitsinerlu malillugu tamatumunnga tunngavilersuutit.
- 5) Arlaannut attumassuteqartuuneq pillugu aalajangerneq. Ilaasortaq arlaannut attuumassuteqartuusutut isigineqartoq, arlaannut attuumassuteqartuuneq pillugu apeqqummut tunngasoq Unammilleqatigiinnermut Ataatsimiititaliap aalajangigaa pillugu akerliliinini protokolimut ilanngullugu allanneqarnissaa piumasarisinnaavaa.

Imm. 2. Unammilleqatigiinnermut Ataatsimiititaliamut ilaasortat ataatsimiissimanerup kingorna kingusinnerpaamik ullut 14-it qaangiutinnginnerini protokolimut allattuiffiit assilinerinik nassinneqarsimassapput. Ilaasortanit ataatsimiinnermi peqataasimasunit protokolimut allassimasut pillugit akerliliissutit aamma naqqiutissatut siunnersuutit protokolip tigoreerneranit kingusinnerpaamik ullut 7-it qaangiutinnginnerini allaganngorlugit Atuisartunut Unammilleqatigiinnermullu Aqutsisoqarfimmut nassiunneqassapput.

Imm. 3. Protokoli tamanut saqqummiunneqartussaangilaq.

Kapitali 9

Arlaannut attuumassuteqarneq

§ 14. Unammilleqatigiinnermut Ataatsimiititaliamut ilaasortaq suliap sammineqarnerani, pisortat ingerlatsineranni sulianik sammisaqartarneq pillugu inatsisartut inatsisaat malillugu ilaasortaq suliami arlaannut attuumassuteqaruni aalajangiisinnaatitaanngilaq, aalajangiinnermi peqataasinnaanngilaq imaluunniit suliap sammiuneqarnerani arlaatigut peqataasinnaanani.

Imm. 2. Ilaasortaq pissutsinik nammineq suliamut arlaatigut attuumassuteqarsinnaanerminut nalornissutaasinnaasoq pillugu ilisimaleruniuk tamanna pillugu piaarnerpaamik Atuisartunut Unammilleqatigiinnermullu Aqutsisoqarfik nalunaarfigissavaa.

Imm. 3. Ilaasortaq pineqartoq peqataatinnagu taanna arlaanut attuumassuteqarnerasoq pillugu Unammilleqatigiinnermut Ataatsimiititaliaq aalajangiissaaq.

Kapitali 10

Nipangiussisimasussaatitaaneq

§ 15. Unammilleqatigiinnermut Ataatsimiititaliamut ilaasortat, sulianullu immikkut ilisimasallit § 6-imi taaneqartut, pisortat ingerlatsineranni sulianik sammisaqartarneq pillugu inatsisartut inatsiaani maleruagassat malillugit nipangiussisimasussaatitaanermik malinnittussaapput. Nipangiussisimasussaatitaanermut ilaapput paasissutissat suulluunniit, ilaasortap pineqartup imaluunniit sulianik immikkut ilisimasallit Unammilleqatigiinnermut Ataatsimiititaliami atuunnerminnut atatillugu ilisimalersimasaat, assersuutigalugu tamakkununga ilaallutik suliffeqarfiit aningaasarsiornikkut niuernikkullu atugaat pillugit paasissutissat, kiisalu paasissutissat allat suliffeqarfimmu pineqartumut pingaaruteqartut.

Imm. 2. Suliffeqarfiup paasissutissanik teknikkimut tunngasunik saqqummiussinerani, tamakkununga ilaallutik ilisimatusarnerit, tunisassioriaatsit, tunisassiat kiisalu ingerlatsinermi niuernermilu isertuussat, unammilleqatigiinnermut inatsimmi § 30 malillugu inuk paasissutissanik Unammilleqatigiinnermut Ataatsimiititaliamut saqqummiussisussaq, Unammilleqatigiinnermut Ataatsimiititaliap siulittaasuanut piumasaqarsinnaavoq, paasissutissat tunniunneqassanngitsut imaluunniit tamanit pissarsiarineqarsinnaassanngitsut, tamakkunungattaq ilaallutik Unammilleqatigiinnermut Ataatsimiititaliamut ilaasortat. Paasissutissat qanoq annertutigisumik qanorlu ilusilerlugit saqqummiunneqartariaqarnerisut pillugit siulittaasoq inaarutaasumik aalajangiissaaq.

Kapitali 11

Atuutsinneqalerfissaa

§ 16. Nalunaarut manna atuutsinneqalissaaq ulloq 15. aggusti 2015.

Imm. 2. Tamatumunnga ilutigitillugu Unammilleqatigiinnermut Ataatsimiititaliap suleriaasissaa taassumalu suliasai pillugit Namminersornerullutik Oqartussat nalunaarutaat nr. 2, 1. februar 2008-meersoq atorunnaarsinneqarpoq.

Namminersorlutik Oqartussat, ulloq 23. juuli 2015.


Vittus Qujaukitsoq

/


Jørn Skov Nielsen

